

Kubłanska konferenca mjeńšin

Flensburg (SN). Štyri w Němskej žiwe awtochtone mjeńšiny a němska mjeńšina w Danskej přewjedu hromadže z Federalistiskej uniju europskich ludowych skupin (FUEN) pjatk w Flensburgu kubłansku konferencu. Při tym steja wužadanja na polu kubłanja za awtochtone mjeńšiny w Europje w srjedžišću. Wužadanja analyzuja a rozjimuja so na přikładach němskich Sewjeroschleswigčanow, danskich Južnoschleswigčanow, Frizow a Serbow. Serbowka Judit Waldzic referuje wo zakładnym prawje na kubłanje.

Schleswigsko-holsteinska ministerka za kubłanje a zastupowaca ministerska prezidentka Ute Erdsiek-Rave (SPD) kaž tež zapóslanc danskeho parlamenta a bywši minister Frode Sørensen postrowitaj wobdźělnikow wuradźowanja, na kotraž je tež sakski kultusowy minister Steffen Flath (CDU) přeprošeny.

50 hosći, zastupjerjo najwšelakorišich europskich mjeńšin, je swoje wobdźělnje hižo připrajiło. Serbow zastupuja předsyda a jednaćel Domowiny Jan Nuk a Bjarnat Cyž kaž tež nawoda RCW Rafael Wowčer. Diskusija zložuje so na zakładne prawo na kubłanje, kotraž je lětuši kongres FUEN w Tallinnje wobzamknył.